

**BOSNA I HERCEGOVINA
FEDERACIJA BOSNE I HERCEGOVINE
UNSKO-SANSKI KANTON
VLADA UNSKO - SANSKOG KANTONA**

-Nacrt-

**ZAKON
O IZVRŠAVANJU BUDŽETA
UNSKO-SANSKOG KANTONA
ZA 2018. GODINU**

Bihać, decembar 2017. godine

Na osnovu člana 11. b) i e) odjeljka A, poglavlja V. Ustava Unsko-sanskog kantona- prečišćen tekst („Službeni glasnik Unsko-sanskog kantona“ broj 1/04 i 11/04) i člana 7. Zakona o Budžetima u Federaciji Bosne i Hercegovine („Službene novine Federacije Bosne i Hercegovine“ br.102/13, 9/14, 13/14, 8/15,91/15,102/15,104/16), Skupština Unsko-sanskog kantona, na prijedlog Vlade Unsko-sanskog kantona, na sjednici održanoj dana _____ 2017. godine, donijela je:

Z A K O N
O IZVRŠAVANJU BUDŽETA UNSKO-SANSKOG KANTONA
ZA 2018. GODINU

POGLAVLJE I - OPĆE ODREDBE

Član 1.

(Predmet Zakona)

Ovim Zakonom uređuje se struktura prihoda i primitaka, te rashoda i izdataka Budžeta Unsko-sanskog kantona za 2018. godinu (u daljem tekstu: Budžet) i njegovo izvršavanje, upravljanje prihodima, izdacima, finansiranje, računovodstvo i nadzor Budžeta, prioriteta plaćanja, zaduživanje i upravljanje dugom, prava i obaveze korisnika budžetskih sredstava (u daljem tekstu: korisnici), kazne za neispunjenje obaveza, te druga pitanja u izvršavanju Budžeta.

Član 2.

(Pojam Budžeta)

Budžet je procjena godišnjih iznosa prihoda i primitaka i utvrđenog iznosa rashoda i izdataka Unsko-sanskog kantona (u daljem tekstu: Kanton), kojeg donosi Skupština Unsko-sanskog kantona (u daljem tekstu: Skupština Kantona).

Član 3.

(Dijelovi Budžeta)

- (1) Budžet se sastoji od općeg i posebnog dijela i kapitalnog Budžeta.
- (2) Opći dio Budžeta se sastoji od Računa prihoda i rashoda, Računa kapitalnih primitaka i izdataka i Računa finansiranja.
- (3) U Računu prihoda i rashoda iskazuju se porezni i neporezni prihodi i primici, te izdaci utvrđeni za finansiranje javnih izdataka na nivou Unsko-sanskog kantona na osnovu zakonskih i drugih propisa.
- (4) U Računu kapitalnih primitaka i izdataka iskazuju se primici od nefinansijske imovine i izdaci za nefinansijsku imovinu.
- (5) U Računu finansiranja iskazuju se primici od finansijske imovine, primljeni krediti i zajmovi, te izdaci za finansijsku imovinu i otplatu kredita i zajmova.
- (6) Posebni dio Budžeta sastoji se od plana rashoda i izdataka budžetskih korisnika (u daljem tekstu: korisnici) iskazanih po vrstama raspoređenih u tekuće izdatke i kapitalne investicije.

Član 4.

(Izmjene i dopune Budžeta)

- (1) Svi rashodi i izdaci moraju biti utvrđeni u Budžetu i uravnoteženi sa prihodima i primicima.
- (2) Izuzetno, ako se u toku budžetske godine, zbog nastanka novih obaveza za Budžet ili promjena privrednih kretanja povećaju rashodi, odnosno smanje prihodi Budžeta, Vlada

Unsko-sanskog kantona (u daljem tekstu: Vlada) može, na prijedlog Ministarstva finansija Unsko-sanskog kantona (u daljem tekstu: Ministarstvo finansija), donijeti odluku o obustavljanju od izvršavanja pojedinih rashoda, u trajanju od 45 dana.

(3) Mjerama privremenog obustavljanja izvršavanja, Vlada može:

- a) zaustaviti preuzimanje obaveza i/ili
- b) predložiti produženje ugovorenih rokova plaćanja i/ili
- c) zaustaviti preraspodjelu budžetskih sredstava, potrebno radi preuzimanja obaveza.

(4) O odluci iz stava (2) ovog člana Vlada, odmah nakon donošenja odluke, izvještava Skupštinu Kantona.

(5) Ako za vrijeme provođenja mjera privremene obustave izvršavanja Budžeta, Budžet se ne uravnoteži, Vlada mora predložiti Skupštini Kantona izmjene i dopune Budžeta, najkasnije u roku od 15 dana prije isteka roka za privremenu obustavu izvršavanja Budžeta.

(6) U toku postupka izmjena i dopuna Budžeta, Vlada može na prijedlog ministra Ministarstva finansija produžiti privremenu obustavu izvršavanja pojedinih zadataka.

Član 5.

(Fiskalna godina)

(1) Budžet se odnosi i važi za fiskalnu 2018.godinu (u daljem tekstu: fiskalna godina).

(2) Fiskalna godina počinje 1. januara, a završava 31. decembra 2018.godine.

Član 6.

(Budžetski korisnici)

(1) Budžetski korisnici su ministarstva, kantonalne uprave, kantonalne upravne organizacije i ostali čije je finansiranje iz Budžeta predviđeno posebnim propisom (u daljem tekstu: korisnik).

(2) Korisnik koji u svom budžetskom razdjelu sadrži potrošačke jedinice, budžetski je za njih nadležan.

POGLAVLJE II - IZVRŠAVANJE BUDŽETA

Član 7.

(Namjensko korištenje sredstava)

(1) Sredstva Budžeta osiguravaju se korisnicima koji su u Posebnom dijelu Budžeta određeni za nosioce sredstava na pojedinim pozicijama.

(2) Korisnici mogu sredstva Budžeta, u skladu sa Finansijskim planom, koristiti samo za namjene koje su određene Budžetom, i to do visine utvrđene u Posebnom dijelu Budžeta.

(3) Korisnicima nije dozvoljeno da stvaraju obaveze, odnosno rashode ili opterećenja budžetskih pozicija, ako ti rashodi ili opterećenja budžetskih pozicija nisu odobreni u okviru iznosa alociranog za tog korisnika.

Član 8.

(Namjenski prihodi i primici)

(1) Namjenski prihodi i primici budžeta, definisani članom 47. Zakona o Budžetima u Federaciji Bosne i Hercegovine („Službene novine Federacije Bosne i Hercegovine“ br.102/13, 9/14, 13/14, 8/15, 91/15,102/15,104/16), uplaćuju se na Depozitni račun javnih prihoda Unsko-sanskog kantona i iskazuju po izvorima iz kojih potiču.

(2) Korisnici su obavezni da prilikom izrade svog dijela Budžeta planiraju rashode i izdatke korisnika iz svoje nadležnosti koji se pokrivaju приходima od obavljanja osnovne djelatnosti.

(3) Donacije, grantovi, koji nisu planirani u Budžetu, a ostvare se u toku godine, namjenski se usmjeravaju odlukom Vlade. Ministarstvo finansija na osnovu pismenog dokaza o uplaćenju donaciji i drugoj odgovarajućoj dokumentaciji korisnika vrši povećanje budžeta na rashodovnoj strani odnosno budžetskog korisnika.

(4) Neutrošena sredstva iz namjenskih prihoda, donacija i grantova, koji nisu utrošeni u prethodnoj godini prenose se u budžet za tekuću budžetsku godinu.

Član 9.

(Način korištenja sredstva Budžeta)

Korisnici sredstva Budžeta koriste u skladu sa odobrenim budžetom, a po dinamici utvrđenoj mjesečnim operativnim planovima.

Član 10.

(Dinamika odobravanja sredstava)

(1) Budžet se izvršava u skladu sa prilivom sredstava na Jedinstvenom računu Trezora.

(2) Mjesečnim operativnim planovima utvrđuje se dinamika preuzimanja obaveza, za koje su sredstva namjenski iskazana u posebnom dijelu Budžeta.

(3) Izuzetno, zbog neusklađenosti priliva sredstava u Budžetu prema mjesečnim operativnim planovima izdataka, Ministarstvo finansija može izmijeniti dinamiku odobravanja sredstava korisnicima.

Član 11.

(Priprema operativnih planova)

(1) Ministarstvo finansija donosi instrukciju o pripremanju i podnošenju operativnih planova korisnika.

(2) Korisnici pripremaju i podnose prijedloge operativnih planova Ministarstvu finansija, za slijedeći mjesec do 25. u tekućem mjesecu.

(3) Prijedlozi operativnih planova obuhvataju rashode za svaki mjesec.

(4) Ako korisnik Ministarstvu finansija ne podnese prijedlog mjesečnog operativnog plana u roku iz stava (2) ovoga člana, mjesečni plan za tog korisnika utvrđuje Ministarstvo finansija.

Član 12.

(Nadzor nad izvršenjem)

(1) Rashodi svakog korisnika ne mogu prelaziti iznose alociranih budžetskih sredstava odobrenih za svaki mjesec ili drugi vremenski period koji utvrdi Ministarstvo finansija.

(2) Ministar Ministarstva finansija (u daljem tekstu: Ministar finansija) ima pravo rješenjem obustaviti od izvršenja svaki akt koji je u suprotnosti sa ovim Zakonom i Zakonom o budžetima u Federaciji Bosne i Hercegovine („Službene novine Federacije BiH“ broj:102/13,9/14, 13/14,8/15,91/15,102/15,104/16).

(3) Korisnik ima pravo prigovora na rješenje iz prethodnog stava Vladi u roku od osam dana od dana prijema rješenja.

Član 13.

(Izvršenje mjesečnih operativnih planova)

Ministarstvo finansija izvršava mjesečne operativne planove po korisnicima i izdacima, u skladu sa raspoloživim sredstvima.

Član 14.

(Neurošena mjesečna sredstva)

Ministarstvo finansija prenosi neurošena sredstva po pojedinim stavkama izdataka iz mjesečnog plana izvršavanja Budžeta na iste stavke u naredni mjesečni plan izvršavanja Budžeta iste budžetske godine.

Član 15.

(Postupak nabavke roba, usluga i radova)

Postupak nabavke roba, usluga i radova obavlja se u skladu sa Zakonom o javnim nabavkama Bosne i Hercegovine („Službeni glasnik Bosne i Hercegovine“ broj: 39/14).

Član 16.

(Preraspodjela sredstva)

(1) Ministarstvo finansija, jednom kvartalno, na prijedlog budžetskog korisnika, može donijeti odluku o prestrukturiranju rashoda u okviru ukupnog iznosa odobrenog za budžetskog korisnika.

(2) Korisniku se odobrava preraspodjela svih vrsta rashoda, a najviše do 10% od ukupno odobrenih rashoda, izuzev tekućih izdataka po osnovu plaća i naknada zaposlenih, sa kojih je dozvoljena preraspodjela samo unutar istih ekonomskih kodova, 611000 i 612000.

(3) U okviru odobrenog budžeta, izuzetno Vlada može na prijedlog Ministarstva finansija, jednom kvartalno, odobriti preraspodjelu sredstava između budžetskih korisnika.

(4) Nije dozvoljena preraspodjela između tekućeg i kapitalnog Budžeta, osim namjenskih prihoda i primitaka, iz člana 8. ovog Zakona.

(5) Uz zahtjev za preraspodjelu odobrenih sredstava, budžetski korisnik mora priložiti odgovarajuću dokumentaciju na osnovu koje se Ministarstvu finansija daju na uvid razlozi za dodatnim sredstvima na budžetskoj stavci koja se povećava do kraja godine, odnosno razlozi za smanjenje odobrenih budžetskih stavki.

Član 17.

(Korištenje aproprijacija)

(1) Odobrene aproprijacije za fiskalnu godinu mogu se koristiti do 31. januara naredne godine.

(2) Aproprijacije se mogu prenositi u narednu fiskalnu godinu za finansiranje kapitalnih projekata iz posebnih fondova, kao i za finansiranje projekata od posebnog značaja za razvoj.

(3) Aproprijacije u svrhu finansiranja višegodišnjih kapitalnih projekata prenose se u narednu fiskalnu godinu prema iznosima i vremenskom rasporedu utvrđenom u Dokumentu okvirnog budžeta.

Član 18.

(Prioriteti izvršavanja Budžeta)

Budžet Unsko-sanskog kantona izvršava se po slijedećim prioritetima:

- a) Krediti,
- b) Plaće, doprinosi i naknade zaposlenima,
- c) Obaveze iz prethodne godine
- d) Beneficije za socijalnu zaštitu, izdaci za boračku populaciju, subvencije u poljoprivredi i privredi,
- e) Ostali izdaci.

Član 19.

(Tekuća rezerva Budžeta)

- (1) Sredstva Tekuće rezerve planirana u budžetu koriste se za nepredviđene namjene, za koje u Budžetu nisu planirana sredstva ili za namjene za koje se tokom godine pokaže da za njih nisu utvrđena dovoljna sredstva jer ih pri planiranju Budžeta nije bilo moguće predvidjeti.*
- (2) Sredstva Tekuće rezerve ne mogu se koristiti za pozajmljivanje i preraspodjelu.*
- (3) Korištenje sredstava Tekuće rezerve Budžeta odobrava Vlada, na prijedlog Ministarstva finansija i Premijer Kantona.*
- (4) Svako korištenje Tekuće rezerve Vlade objavljuje se u „Službenom glasniku Unsko-sanskog kantona“.*
- (5) Vlada raspolaže sredstvima Tekuće rezerve do iznosa od 70.000 KM, a Premijer Kantona može u toku fiskalne godine raspolagati sredstvima iz Tekuće rezerve Budžeta do iznosa 30.000 KM.*
- (6) Ministarstvo finansija obavezano je tromjesečno izvještavati Vladu o korištenju Tekuće rezerve Budžeta.*
- (7) Vlada polugodišnje izvještava Skupštinu Kantona o korištenju sredstava Tekuće rezerve Budžeta.*

Član 20.

(Kriteriji za korištenje Tekuće rezerve)

- (1) Budžetskim korisnicima može se odobriti korištenje sredstava tekuće rezerve ukoliko ispunjavaju jedan od slijedećih kriterija:
 - a) finansiranje hitnih i nepredviđenih rashoda i izdataka za tekuću fiskalnu godinu,*
 - b) finansiranje hitnih i nepredviđenih izdataka za sponzorstva i pokroviteljstva, kada se kao sponzor ili pokrovitelj pojavljuje Vlada,*
 - c) sufinansiranje odobrenih programa finansiranih iz drugih izvora, a koji se realizuju sa domaćim ili inostranim partnerom ili drugim nivoom vlasti.**
- (2) Drugim nivoima vlasti (grad i općine na području Kantona) može se odobriti korištenje sredstava tekuće rezerve u slučaju elementarnih nepogoda i drugih prirodnih nesreća, pod uslovima da je stanje elementarne nepogode proglašeno od strane nadležnog organa.*
- (3) Ostalim korisnicim, koji nisu definisani kao budžetski korisnici ili drugi nivoi vlasti, može se odobriti korištenje sredstava Tekuće rezerve u slučaju:
 - a) finansiranje dijela hitnih i nepredviđenih troškova za učešće pojedinaca i udruženja građana ili sportskih klubova sa područja Kantona na svjetskim, evropskim i državnim takmičenjima, manifestacijama i skupovima, ako se takvo učešće nije moglo predvidjeti na početku fiskalne godine,*
 - b) finansiranje nepredviđenih projekata od interesa za Kanton,*
 - c) u drugim slučajevima kada Vlada Kantona utvrdi da je korištenje sredstava budžetske rezerve za pokriće hitnih i nepredviđenih korisnika od interesa za Kanton.**

Član 21.

(Prenos nadležnosti, odnosno prestanak postojanja Budžetskog korisnika)

(1) *Ako se u toku fiskalne godine prenesu određene nadležnosti budžetskog korisnika ili sam budžetski korisnik prestane da postoji, Vlada je dužna da uspostavi komisiju za popis imovine, obaveza i potraživanja. Nakon usvajanja izvještaja komisije, Ministarstvo finansija vrši prenos neutrošenih sredstava za njegove rashode i izdatke u Tekuću rezervu Budžeta ili budžetskom korisniku koji preuzima njegove poslove, na osnovu odluke Vlade.*

(2) *Ako se u toku fiskalne godine prošire određene nadležnosti budžetskog korisnika ili se uspostavi novi budžetski korisnik, Vlada je dužna da obezbjedi sredstva za finansiranje istog iz Tekuće rezerve Budžeta.*

Član 22.

(Uplata javnih prihoda)

Sav prikupljeni i naplaćeni javni prihod, koji pripada Budžetu, obavezno se uplaćuje na Depozitni račun javnih prihoda Unsko-sanskog kantona, u skladu sa Zakonom o trezoru u Federaciji Bosne i Hercegovine („Službene novine Federacije Bosne i Hercegovine“ broj: 19/03, 58/02, 19/03, 79/07), i Pravilnikom o načinu uplate javnih prihoda budžeta i vanbudžetskih fondova na teritoriji Federacije Bosne i Hercegovine.

Član 23.

(Povrat više ili pogrešno uplaćenih prihoda)

(1) *Povrat više ili pogrešno uplaćenih prihoda u tekućoj godini vrši se sa računa javnih prihoda (depozitnog računa) iz tekućeg priliva.*

(2) *Povrat više ili pogrešno uplaćenih prihoda koji nisu uplaćeni u tekućoj godini vrši se sa transakcijskog računa Budžeta Kantona ili namjenskih podračuna.*

(3) *Povrat više ili pogrešno uplaćenih javnih prihoda vrši se na osnovu dokumentacije sa kojom se raspolaze o više ili pogrešno uplaćenom javnom prihodu i rješenja koje izdaje nadležni organ za kontrolu javnih prihoda.*

(4) *Rješenje donosi Ministarstvo finansija, a u skladu sa Pravilnikom o procedurama za povrat i preknjiženje više ili pogrešno uplaćenih javnih prihoda sa Jedinog računa trezora Unsko-sanskog kantona („Službeni glasnik Unsko-sanskog kantona“ broj: 7/06, 9/10).*

Član 24.

(Troškovi službenog puta)

Visina dnevnica, naknada za putne i druge troškove koji nastanu u vezi službenih putovanja, za sve korisnike koji se finansiraju iz sredstava Budžeta, određuje se posebnim aktom Vlade Unsko-sanskog kantona.

Član 25.

(Naknada skupštinskim zastupnicima)

Sredstva utvrđena u razdjelu 10. Budžeta, pozicija “Naknada skupštinskim zastupnicima” (poslanički paušal) doznačavaju se Skupštini Kantona, na osnovu Zakona kojima se reguliše odnosna oblast, akata koje donosi Skupština Kantona i radna tijela Skupštine i sredstava planiranih u Budžetu.

Član 26.
(Sredstva za parlamentarne stranke)

Sredstva utvrđena u razdjelu 10. Budžeta, pozicije „Grant neprofitnim organizacijama-parlamentarne stranke“ raspoređuje se na način da se:

- a) 40% sredstava dijeli jednako svim političkim strankama, koje su osvojile mandate,*
- b) 60% sredstava dijeli prema broju poslanički mandata, koje svaka politička stranka ima na dan dodjele mandata.*

Član 27.
(Sredstva za sudska izvršenja)

Sredstva utvrđena u razdjelu 11. Budžeta, pozicija „Sudska izvršenja-nagodbe“ izvršavaju se u skladu sa pozitivnim zakonskim propisima.

Član 28.
(Sufinansiranje rada Agencije za privatizaciju)

Sredstva utvrđena u razdjelu 11. Budžeta, pozicija «Grant Agencija za privatizaciju» služe za sufinansiranje rada Agencije za privatizaciju Unsko-sanskog kantona.

Član 29.
(Učešće Vlade u projektima)

(1) Sredstva utvrđena u razdjelu 11. Budžeta, pozicija «Učešće Vlade u međunarodnim projektima», raspoređuju se Odlukom Vlade na osnovu iskazanih potreba za učešće u zajedničkom projektu.

(2) Sredstva utvrđena u razdjelu 19. Glava 01 Budžeta, pozicija „Učešće u projektima“ raspoređuju se Odlukom Vlade o sufinansiranju, na osnovu iskazanih potreba za učešće u zajedničkom projektu domaćih i stranih donatora.

Član 30.
(Nabavka zemljišta i građevina)

Sredstva utvrđena u razdjelu 17. glava 02 pozicije “Nabavka zemljišta”, sredstva utvrđena u radjelu 11.,12., 17. glava 03, 18. glava 03,04 i 05 Budžeta, pozicija „Nabavka građevina“ i sredstva utvrđena razdjel 18 glava 03,04,05 – pozicija “Nabavka zgrada i stanova“, izvršit će se u skladu sa Odlukom Vlade.

Član 31.
(Sredstva od ŠPD „Unsko-sanske šume“)

Sredstva od ŠPD“Unsko-sanske šume“ Bosanska Krupa, utvrđena u razdjelu 11. Budžeta, rasporedit će se odlukom Vlade.

Član 32.
(Tekući grantovi i Tekući grantovi drugim nivoima)

(1) Sredstva utvrđena u razdjelu 18. „Ostali grantovi pojedincima-naučno istraživački rad“ i „Grantovi pojedincima- smještaj i ishrana učenika u đačkim domovima“ dodjeljuju se prema kriterijima, koje na prijedlog resornog ministarstva donosi Vlada.

(2) Sredstva utvrđena u razdjelu 11., 13., 16.,17., 19., 26. i 27. „Tekući grantovi drugim nivoima“ realizirat će se drugim nivoima prema programu utroška sredstava koji donosi Vlada.

(3) Za sredstva utvrđena u razdjelu 20. "Tekući grantovi" i to: „Grantovi općinama-pretvorba nepoljoprivrednog zemljišta u poljoprivredno“, „Ostali grantovi pojedincima-pretvorba nepoljoprivrednog zemljišta u poljoprivredno“, „Grantovi neprofitnim organizacijama-pretvorba nepoljoprivrednog zemljišta u poljoprivredno“, „Grant deminiranje poljoprivrednih površina“, „Grant neprofitnim organizacijama- korištenje lovišta“, „Grant neprofitnim organizacijama-sufinansiranje rada poljoprivrednih udruženja“ i „Grant neprofitnim organizacijama-Ribolovna društva“, provest će se postupak javnog oglašavanja, po kriterijima koje će utvrditi Vlada, na prijedlog resornog ministarstva.

Član 33.

(Realizacija Odluka Ustavnog suda po apelacijama)

Sredstva utvrđena u razdjelu 13. »Grantovi pojedincima - Odluke Ustavnog suda po apelacijama«, služit će za realizaciju Odluka Ustavnog suda.

Član 34.

(Ostala domaća pozajmljivanja)

Sredstva utvrđena u razdjelu 14. ekonomski kod 822600 „Izdaci za finansijsku imovinu“ vratit će se na namjenske račune Budžeta Unsko-sanskog kantona.

Član 35.

(Grantovi neprofitnim organizacijama – RA USK)

Sredstva utvrđena u razdjelu 15. Budžeta "Grantovi neprofitnim organizacijama- RA USK" služe za sufinansiranje rada JU „Razvojna agencija Unsko-sanskog kantona“ Bihać.

Član 36.

(Grantovi boračka udruženja)

Za raspoređivanje sredstava utvrđenih u razdjelu 16. Budžeta «Grantovi boračka udruženja» provest će se postupak javnog oglašavanja po kriterijima koje će utvrditi Vlada, na prijedlog resornog ministarstva.

Član 37.

(Subvencije javnim preduzećima i ustanovama)

Za raspoređivanje sredstva utvrđenih u razdjelu 18. i 19. Budžeta „Subvencije javnim ustanovama“ i sredstava utvrđenih u razdjelu 15. i 19. Budžeta "Subvencije javnim preduzećima i poduzetnicima", provest će se postupak javnog oglašavanja po kriterijima koja utvrdi Vlada, na prijedlog resornog ministarstva.

Član 38.

(Sredstva za vjeru, kulturu, sport i predškolsko obrazovanje)

- (1) Sredstva utvrđena u razdjelu 18. pozicije «Grant za vjeru» i pozicija "Grant za sport" koriste se po programu, koji na prijedlog resornog ministarstva, donosi Vlada.
- (2) Sredstva utvrđena u razdjelu 18. «Grant za kulturu» i „Grant za mlade“ dodjeljuju se putem javnog poziva, po utvrđenim kriterijima, koje na prijedlog resornog ministarstva, donosi Vlada.
- (3) Sredstva utvrđena u razdjelu 18. pozicija " Grant predškolsko obrazovanje – dječiji vrtići "i „grant privatni vrtići“, služe za financiranje rada predškolskih ustanova.

Član 39.

(Rekonstrukcija školskih objekata)

Sredstva utvrđena u razdjelu 18. pozicije «rekonstrukcija i investiciono održavanje» raspoređit će na korisnike svojom Odlukom Vlada, na prijedlog resornog ministarstva.

Član 40.

(Kapitalni grantovi kulture)

Sredstva utvrđena u razdjelu 18. glava 01 pozicije „Kapitalni grantovi- učešće Vlade USK u sufinansiranju zaštite kulturnih, nacionalnih i historijskih spomenika i revitalizaciju gradskih jezgri“ i „Kapitalni transferi neprofitnim organizacijama-obnova objekata kulture“, raspoređit će se na dodjeljuju se putem javnog poziva, na osnovu kriterija koje će utvrditi Vlada na prijedlog resornog ministarstva.

Član 41.

(Studije, projektne pripreme i projektovanje)

Sredstva utvrđena na pozicijama «Studije, projektne pripreme i projektovanje», na osnovu programa predloženog od strane resornog ministarstva, raspoređuje Vlada.

Član 42.

(Subvencije u poljoprivredi)

Sredstva utvrđena u razdjelu 20. Budžeta, pozicija „Subvencije u poljoprivredi“ raspoređuje resorno ministarstvo, u skladu sa posebnim propisima.

Član 43.

(Ostali kapitalni grantovi)

Sredstva utvrđena u razdjelu 15, 16., 17., 18. i 20. Budžeta “Kapitalni grantovi”, koriste se po programima koje donosi Vlada, na prijedlog resornih ministarstava.

Član 44.

(Sredstva za posebne namjene)

Sredstva utvrđena u razdjelu 27. Budžeta «Posebne namjene» su namjenska sredstva za zaštitu i spašavanje, akumulirana iz prethodnih godina, a koriste se u skladu sa Odlukom o uslovima i načinu korištenja sredstava ostvarenih po osnovu posebnog poreza za zaštitu od prirodnih i drugih nesreća («Službene novine Federacije BiH» broj: 46/05 i 61/07), na osnovu Godišnjeg plana korištenja sredstava za zaštitu i spašavanje, kojeg donosi Kantonalna uprava civilne zaštite, uz pribavljeno mišljenje Kantonalnog štaba civilne zaštite.

Član 45.

(Izdaci za kamate)

Sredstva utvrđena u razdjelima “Izdaci za kamate i ostale naknade” izvršavaju se po dospelosti plaćanja.

Član 46.

(Grantovi pojedincima, grantovi neprofitnim organizacijama i subvencije javnim preduzećima i ustanovama)

(1) Sredstva utvrđena u razdjelima Budžeta „Grantovi nižim nivoima vlasti“, “Grantovi pojedincima, grantovi neprofitnim organizacijama i subvencije javnim preduzećima i

ustanovama” koriste se po osnovu programa koje donosi Vlada, na prijedlog resornih ministarstava.

(2) Ispata sredstava granta u tekućoj godini nije moguća prije nego što se opravdaju sredstva doznačena u prethodnoj godini.

Član 47.

(Program utroška sredstava)

(1) Nadležni korisnici budžetskih sredstava, a koji su u obavezi u skladu sa odredbama ovog Zakona, predlažu Vladi programe utroška sredstava.

(2) Sredstva se ne mogu koristiti prije nego što se operativno odobri i Vlada svojom Odlukom prihvati program utroška.

(3) Bitni elementi programa su: naziv i svrha programa, visina i izvori sredstava i naziv organizacije koja prima grant.

(4) Ukoliko programom utroška sredstva raspoređuju na budžetskog korisnika, raspoređivanje će se vršiti u skladu sa članom 16. Ovog Zakona.

(5) O utrošenim sredstvima iz stava (1) ovog člana budžetski korisnici polugodišnje izvještavaju Vladu.

Član 48.

(Plan nabavke stalnih sredstava)

Korisnik izrađuje Plan nabavke stalnih sredstava, koji mora biti u skladu sa prijedlogom finansijskog plana budžetskog korisnika i predlaže ga nadležnom ministarstvu, odnosno organu nadležnom za budžetskog korisnika.

Član 49.

(Naknade troškova zaposlenih)

Sredstva, pozicija “Naknade troškova zaposlenih” doznačavaju se korisnicima Budžeta na osnovu Zakona kojima se reguliše odnosna oblast, akata koje donosi Vlada, sredstava planiranih u Budžetu i drugih općih akata.

Član 50.

(Naknade za pomoć u slučaju smrti, bolesti ili teže invalidnosti)

(1) Sredstva utvrđena u razdjelima Budžeta “Pomoć u slučaju smrti ili teže invalidnosti” doznačavaju se korisnicima Budžeta na osnovu zakona kojima se reguliše odnosna oblast, akata koje donosi Vlada, sredstava planiranih u Budžetu i drugih općih akata.

(2) Listu težih bolesti donosi Ministarstvo zdravstva, rada i socijalne politike.

Član 51.

(Način obavljanja platnih transakcija)

(1) Svi prikupljeni i naplaćeni javni prihodi koji pripadaju Budžetu obavezno se uplaćuju na Depozitni račun za prikupljanje javnih prihoda Unsko-sanskog kantona.

(2) Obavljanje platnih transakcija vrši se preko transakcijskog računa koji je sastavni dio Jedinstvenog računa Trezora.

(3) Potpisnici naloga platnih transakcija putem računa iz stava 1. i 2. ovog člana su Premijer Kantona i Ministar finansija.

(4) U odsutnosti lica iz stava 3. ovog člana, Vlada će, na prijedlog Premijera Kantona, odnosno Ministra finansija ovlastiti potpisnika naloga platnih transakcija.

Član 52.

(Naredbodavci finansijskih planova)

Naredbodavac za finansijske planove Budžeta po odobrenim budžetskim pozicijama su Vlada, Premijer Kantona, ministri i rukovodioci drugih korisnika.

Član 53.

(Prihodi ostvareni obavljanjem vlastite djelatnosti)

- (1) Prihodi koje Budžetski korisnici ostvaruju obavljanjem vlastite djelatnosti moraju se uplaćivati na depozitni račun javnih prihoda Unsko-sanskog kantona.*
- (2) Uplata po osnovu ostvarenih vlastitih prihoda korisnika budžeta evidentiraju se kao vlastiti prihod svakog budžetskog korisnika u glavnoj knjizi trezora.*
- (3) Sredstva uplaćena po tom osnovu, ukoliko se neutroše u toku godine, ostaju na Jedinstvenom računu i postaju javni prihodi.*

Član 54.

(Primjena drugih Zakona)

Za sve što nije regulisano ovim Zakonom primjenjuju se odredbe Zakona o Budžetima u Federaciji Bosne i Hercegovine («Službene novine Federacije BiH», broj: 102/13, 9/14, 13/14, 8/15, 91/15, 102/15, 104/16).

POGLAVLJE III - KONTROLA IZVRŠENJA BUDŽETA

Član 55.

(Interni nadzor)

- (1) Ministri su dužni urediti sistem internog nadzora ministarstva i korisnika koji spadaju u njihovu nadležnost, a kako bi se osiguralo izvršavanje aktivnosti u okviru osnovne djelatnosti.*
- (2) Ministarstva i drugi budžetski korisnici odgovorni su za zakonitost, svrsishodnost, efikasnost i za ekonomično raspolaganje budžetskim sredstvima.*

POGLAVLJE IV- ZADUŽIVANJE I UPRAVLJANJE DUGOM

Član 56.

(Zaduženje Kantona)

- (1) Kanton može stvoriti obaveze po osnovu zaduživanja, u skladu sa Zakonom o dugu, zaduživanju i jamstvima u Federaciji Bosne i Hercegovine („Službene novine Federacije Bosne i Hercegovine“ broj : 86/07, 24/09, 44/10).*
- (2) Kanton se može dugoročno zadužiti, u skladu sa odredbama člana 7. stav (2) Zakona o dugu i zaduživanju i jamstvima u Federaciji Bosne i Hercegovine, a najviše do iznosa 12.500.000 KM.*
- (3) Kanton se može kratkoročno zadužiti unutar države u svrhu privremenog finansiranja deficita nastalog iz gotovinskog toka, po Odluci Skupštine Kantona..*
- (4) Kratkoročni dug, iz prethodnog stava, oplatit će se u tekućoj fiskalnoj godini, te ni u kom periodu u toku fiskalne godine ne smije preći 5% ostvarenih prihoda bez primitaka, u prethodnoj fiskalnoj godini.*

Član 57.

(Način zaduženja i otplata duga)

- (1) Kanton može stvoriti obaveze po osnovu zaduživanja ili izdavanja garancija, do visine utvrđene Odlukom o utvrđivanju i visini novih zaduženja servisiranja duga u Federaciji Bosne i Hercegovine.
- (2) O visini zaduživanja i garancijama odlučuje Skupština Kantona, na prijedlog Vlade.
- (3) Otplata duga Kantona predstavlja obavezu Kantona.
- (4) Dug grada ili općina sa područja Kantona ne predstavlja direktnu ili indirektnu obavezu Kantona, izuzev ukoliko Ministarstvo finansija nije izdalo garancije u vezi sa kreditom grada ili općine.

Član 58.

(Svrha zaduženja)

Kanton se može zadužiti u slijedeće svrhe:

- a) za finansiranje budžetskog deficita;
- b) za finansiranje kapitalnih investicija i posebnih programa odobrenih od Skupštine Kantona;
- c) za refinansiranje ukupnog ili dijela neizmirenog duga Kantona;
- d) plaćanje po osnovu izdanih garancija u potpunosti ili djelimično u slučajevima kada zajmoprimac ne isplati svoje obaveze.

Član 59.

(Izdavanje garancije)

- (1) Kanton može izdati garanciju samo za finansiranje kapitalnih investicija i samo pod uslovom da je pravno lice koje je zajmoprimac sredstava pravno lice čiji je većinski vlasnik Kanton ili je pod nadzorom Kantona.
- (2) Kanton može izdati garanciju za finansiranje kapitalnih investicija i za pravno lice koje je zajmoprimac sredstava, čiji je većinski vlasnik grad/općina ili pod nadzorom grada odnosno općine, ukoliko se kapitalna investicija finansira iz sredstava međunarodnih finansijskih institucija, sve pod uslovom da garanciju izda Bosna i Hercegovina i Federacija Bosne i Hercegovine.
- (3) Prije izdavanja garancije iz stava (2) ovog člana, grad/općina na čijem području će se realizovati kapitalna investicija, obavezna je prethodno dostaviti izdanu garanciju gradskog odnosno općinskog vijeća.
- (4) Ministarstvo finansija vodi popis duga, izdanih jemstava i zajmova, a evidentira ih u sistemu Glavne knjige trezora.

Član 60.

(Oblik zajma i vrste obezbjeđenja)

- (1) O obliku zajma i vrsti instrumenta obezbjeđenja odlučuje Vlada.
- (2) Ugovore o zaduživanju Budžeta i izdavanju garancija potpisuje Ministar finansija.

POGLAVLJE IV- KAZNENE ODREDBE

Član 61.

(Novčane kazne)

Odgovorno lice budžetskog korisnika kažnjava se za prekršaj koji napravi, u skladu sa kaznenim odredbama Zakona o budžetima u Federaciji Bosne i Hercegovine.

POGLAVLJE V – ZAVRŠNE ODREDBE

Član 62.

(Donošenje podzakonskih propisa)

Ministar finansija, uz suglasnost Vlade, donosi pravilnike, uputstva, naredbe i druge akte za provedbu ovog Zakona.

Član 63.

(Stupanje na snagu Zakona)

Ovaj Zakon stupa na snagu narednog dana od dana objavljivanja u "Službenom glasniku Unsko-sanskog kantona", a primjenjuje se za fiskalnu 2018. godinu.

Broj: _____ /
Bihac, _____ / godine

Predsjedavajući Skupštine
Unsko-sanskog kantona